

ՍՍՏՐԱՊՈՒԹԻԻՆՆԵՐԻ ՀԵՐՈՂՈՏԵԱՆ ՑՈՒՑԱԿԸ (ՊԱՏՄԱԱՇԽԱՐՀԱԳՐԱԿԱՆ ՔՆՆՈՒԹԻՒՆ)

ՅՈՎՀԱՆՆԷՍ Գ. ԽՈՐԻԿԵԱՆ
hovhkhori78@mail.ru

Դարեհ Ա. Վշտասպորդին (Ք.ա. 522-486), յաղթելով իշխանութեան համար մղուած պայքարում եւ վերականգնելով Պարսից Տէրութիւնը, այն բաժանում է 20 սատրապութիւններ¹: Սատրապութիւնների ցանկը պահպանուել է Հերոդոտոսի աշխատութիւնում², սակայն ըստ որոշ ուսումնասիրողների ցուցակը չի համապատասխանում պարսից արքաների արձանագրութիւններում յիշատակուող երկրների հերթականութեանը: Խնդիրն այն է, որ սեպագիր արձանագրութիւններում՝ ի դէմս թուարկուող երկրների, մասնագիտական գրականութեան մէջ փորձել են տեսնել Աքեմէնեան Պարսկաստանի վարչական բաժանման արտացոլումը: Օրինակ, տարակարծութիւնների տեղիք կարող է տալ այն հարցը, թէ ինչու Պարթեւաստանը, Արեւյան, Սոգդը եւ Խորեզմը ընդգրկուած են ԺԶ. սատրապութեան մէջ, երբ արձանագրութիւններում այդ երկրները յիշատակուած են առանձին-առանձին: Այս եւ այլ անհամապատասխանութիւնները, բնականաբար, պատճառ կը հանդիսանան զգուշութեամբ եւ վերապահութեամբ քննելու Հերոդոտոսի տեղեկութիւնները:

Ոմանք, հերոդոտեան ցուցակն համարել են Հերոդոտոսին կամ նրա աղբիւր Հեկատէոսին յայտնի էթնիկական եւ աշխարհագրական անունների կամայական հաւաքածո³: Որոշ ուսումնասիրողներ էլ կարծում են, որ արձանագրութիւններում թուարկուող երկրները ներկայանում են որպէս պատմամշակութային ընդհանրութիւններ, որոնք միշտ չէ, որ պէտք է համապատասխանէին վարչական բաժանումներին⁴, յատկապէս, եթէ նկատի ունենանք, որ Բեհիսթունի բարձրաքանդակներում ընդգծուած են խռովարար, ինքնակոչ թագաւորների ազգագրական նկարագրի առանձնայատկութիւնները: Կարծիք է յայտնուել նաեւ, թէ Հերոդոտոսը նկարագրել է իր ապրած ժամանակաշրջանի պարսից պետութեան բաժանումը, որը համընկնում է Արտաքսէրքսէս Ա.ի կառավարման ժամանակաշրջանին (Ք. ա. 465-424)⁵: Բազմաթիւ ուսումնասիրողների ենթադրութեամբ, Հերոդոտոսին աղբիւր է ծառայել Հեկատէոսը, չնայած Հերոդոտոսը նոյնպէս կարող էր կատարել որոշ յաւելումներ, ընդ որում Հեկատէոսի կամ Հերոդոտոսի ցուցակի հիմքում ընկած է մի պարսկական պաշտօնական աղբիւր⁶: Սակայն կայ նաեւ տեսակէտ, թէ Հերոդոտոսը տուեալ հատուածը շարադրելիս ոչ մի պարսկական պաշտօնական աղբիւր էլ չի ունեցել, այլ օգտուել է Հեկատէոսի երկից եւ քարտեզից, որտեղ ներկայացուած են Ասիան բնակեցրած տարբեր ժողովուրդներ⁷:

Իգոր Դիակունովի կարծիքով, Հերոդոտոսի ցուցակում սատրապութիւնները թուարկուած են նախ Մարական Տէրութեանը, յետոյ Աքեմէնեան Պետութեանը միացման հերթականութեամբ⁸: Իրանագէտ Էրնստ Հերցֆելդը գտնում է, որ Հեկատէոսը ունեցել է մինչեւ Ք.ա. 514 թուականը կազմուած սատրապութիւնների ամբողջական ցուցակի ընդօրինակութիւնը, իսկ Հերոդոտոսի մօտ ցուցակը ներկայացուած է աղճատուած, առանձին մէջբերումների տեսքով, չնայած դրանք պարունակում են սատրապութիւնների պաշտօնական անուանումները եւ հիմք են տալիս պատկերացում կազմել Հեկատէոսի ցուցակի մասին⁹:

Այս տարակարծութիւնների պատճառն, անշուշտ, այն է, որ պարսկական պաշտօնական աղբիւրը մեզ չի հասել: Մեր կարծիքով, հարցի լուծման բանալին առկայ է հենց Հերոդոտոսի երկում: Սակայն, ելնելով քննութեան շահեկանութիւնից, նախ ամբողջութեամբ մէջբերենք յոյն պատմիչի երկի այն հատուածը, որտեղ նկարագրում են Աքեմէնեան Պարսկաստանի վարչական միաւորները՝ սատրապութիւնները: Այսպէս, Հերոդոտոսը գրում է. *«Հոնիացիներից, Ասիայի մագնէսեաններից, Էոլեաններից, կարիացիներից, լիւկիացիներից եւ միլիւացիներից եւ պամփիլիացիներից, քանի որ նրանց բոլորի համար սահմանուել էր մէկ ընդհանուր հարկ, ստացում էր չորսհարիւր տաղանդ արծաթ: Այս էլ Դարեհի հաստատեց որպէս առաջին (այս եւ յաջորդ ընդգծումները մերն են - Յ.Խ.) նահանգ: Միւսիացիներից, լիւդիացիներից, լասոններից, կարալներից եւ հիւտեններից [ստացում էր] հինգհարիւր տաղանդ. այս էլ երկրորդ նահանգն էր: Դէպի ներս նաւարկելիս աջակողմեան հելլեսպոնտոսցիներից, փոնդիացիներից, Ասիայի թրակացիներից, պամփիլացիներից, մարիանդիներից եւ սիրիացիներից [ստացուող] հարկը երեքհարիւր վաթսուն տաղանդ. այս նահանգը երրորդն էր: Կիլիկեցիները տալիս էին երեքհարիւր վաթսուն սպիտակ ձի, տարուայ իւրաքանչիւր օրուայ համար մէկ ձի, եւ հինգհարիւր արծաթ տաղանդ, որից հարիւրքառասունը ծախսում էր կիլիկեան երկիրը պահպանող հեծելազօրի վրայ, իսկ երեքհարիւր վաթսունը հասնում էր Դարեհին: Սա չորրորդ նահանգն էր: Պոսիդէոն քաղաքից, որը հիմնել է Ամփիարատսի որդի Ամփիլոքոսը Կիլիկիայի եւ Միրիայի սահմանին, մինչեւ Եգիպտոս ընկած երկիրը, բացի արաբների երկրից, որն սպահարկ էր, ստացում էր երեքհարիւր յիսուն տաղանդ հարկ: Այս նահանգի մէջ էին ամբողջ Փիւնիկիան եւ Պաղեստինեան կոչուած Միրիան ու Կիպրոսը: Սա հինգերորդ նահանգն էր: Եգիպտոսից եւ Լիբիայի, Կիրենէի ու Բարկայի՝ Եգիպտոսին յարած մասերից, որոնք ընդգրկուած էին Եգիպտական նահանգի կազմում, ստացում էր եօթհարիւր տաղանդ, չհաշուած Մոյրիս լճի ձկնորսութիւնից ստացուող արծաթը: Ահա այդ արծաթից եւ իբրեւ հարկ վերցուող ցորենից բացի [այդ երկրից] ստացում էր*

եօթհարիւր տաղանդ: Քանզի Մենկիսի սպիտակ բերդում հաստատուած պարսիկների եւ նրանց վարձկանների համար վերցում էր տասներկու բիր մեդիմնու¹⁰ ցորեն: Սա վեցերորդ նահանգն էր: Մատտագիւտները, գանդարիները, դադիկները եւ ապարիւտները համատեղ վճարում էին [տարեկան] հարիւրեօթանասուն տաղանդ հարկ: Սա եօթերորդ նահանգն էր: Սուսայից եւ կիսսիեցիների երկրի մնացած մասից վերցում էր երեքհարիւր տաղանդ: Սա ութերորդ նահանգն էր: Բաբելոնից եւ մնացեալ Ասորեստանից ստացում էին հազար տաղանդ եւ հինգհարիւր ներքինիացուած տղաներ. սա իններորդ նահանգն էր: Ագրատանան, Մեդիայի մնացեալ մասը, պարիկանիները եւ օրթոկորիբանտիները վճարում էին չորսհարիւր յիսուն տաղանդ. սա տասներորդ նահանգն էր: Գասպերը, պաուսիկները, պանտիմաթները եւ դարեյտները, մէկ նահանգ կազմած, վճարում էին երկուհարիւր տաղանդ: Սա էլ տասնմէկերորդ նահանգն էր: Բակտրիացիներից մինչեւ Այզլերի [երկիրը բնակուողները] վճարում էին երեքհարիւր տաղանդ հարկ. սա էլ տասներկուերորդ նահանգն էր: Պակտիլիկէից, արմէններից եւ հարեւաններից մինչեւ Եուքսինեանը ստացում էր չորսհարիւր տաղանդ. սա տասներեքերորդ նահանգն էր: Մագարտիները, սարանգները, թամանները, ուտիները, միւկերը եւ Գարմիր Օնվում գտնուող կրզիների բնակիչները, որտեղ արքան բնակեցնում է, այսպէս կոչուած, տեղահանուածներին, այս բոլորը վճարում էին վեցհարիւր տաղանդ հարկ. սա տասնչորսերորդ նահանգն էր: Սակերը եւ կասպերը վճարում էին երկուհարիւր տաղանդ. սա տասնհինգերորդ նահանգն էր: Պարթեւները, քորասմները, սոգդերը եւ արեյները վճարում էին երեքհարիւր տաղանդ. սա տասնվեցերորդ նահանգն էր: Պարիկանիները եւ Ասիայի եթովպացիները վճարում էին չորսհարիւր տաղանդ. սա տասնեօթերորդ նահանգն էր: Մատիէնների, սասպէյրների եւ ալարոդների վրայ սահմանուած էր երկուհարիւր տաղանդ հարկ. սա տասնութերորդ նահանգն էր: Մոսքերի, տիբարէնների, մակրոնների, մոսսինոյկների եւ մարերի վրայ սահմանուեց երեքհարիւր տաղանդ [հարկ]. սա տասնիններորդ նահանգն էր: Իսկ հնդիկները, լինելով մեզ յայտնի ազգերի մէջ բոլորից առաւել մեծաթիւ, պարտաւոր էին, միւսների հետ համեմատած, բոլորից առաւել հարկ վճարել՝ երեքհարիւր վաթսուն տաղանդ ոսկէ աւազ. սա քսաներորդ նահանգն էր»¹¹:

Այսպիսով, Հերոդոտոսի ցուցակում, 20 սատրապութիւնների կազմում յիշատակում են Պարսից տէրութեան մէջ մտնող շուրջ 70 էթնոսներ եւ երկրներ, այն դէպքում, երբ Բեհիսթունի արձանագրութիւնում թուարկուած են 23 երկրներ: Այդ երկրներն են Պարսքը, Էլամը, Բաբելոնիան, Ասուրեստանը, Արաբիան, Եգիպտոսը, այն երկրները, որոնք ծովի մօտ են, Սարդիսը, Հոնիան, Մեդիան, Արմինան, Գապադովկիան,

Պարթեաստանը, Դրանգիանան, Արեւյան, Խորեզմը, Բակտրիան, Սոգդիանան, Գանդարան, Սկիւթիան, Սատտագիւտիան, Արախոսիան, Մական¹²: Այս երկրները աշխարհագրորէն լրի կամ մասամբ համապատասխանում են հերոդոտեան ցուցակի հետեւեալ սատրապութիւններին. Հոնիան համապատասխանում է Ա., Սարդիսը՝ Բ. սատրապութեանը, Գ. սատրապութեան էթնոսների շարքում սիրիացիների յիշատակումը թոյլ է տալիս Կապադովկիան համապատասխան համարել այս սատրապութեանը, Ասուրեստանը՝ Ե., Եգիպտոսը՝ Զ., Սատտագիւտիան, Գանդարան՝ Է., Էլամը՝ Ը., Բաբելոնիան՝ Թ., Մեդիան՝ Ժ., Բակտրիան՝ ԺԲ., Արմինան՝ ԺԳ., Դրանգիանան՝ ԺԴ., Սկիւթիան՝ ԺԵ., Պարթեաստանը, Խորեզմը, Սոգդիանան, Արեւյան ամբողջովին՝ ԺԶ., Մական՝ ԺԷ.: Պարսքը որպէս ապահարկ երկիր Հերոդոտոսը չի նշում սատրապութիւնների թում¹³: Իսկ «tyaiy drayahyā»՝ «այն երկրները, որոնք ծովի մօտ են» արտայայտութիւնը, մեր կարծիքով, աշխարհագրորէն կարող է համապատասխանել Փոքր Ասիայի հարաւարեւելեան ափամերձ անկիւնին, աւելի ստոյգ Կիլիկիային՝ Դ. սատրապութեանը, եւ, հնարաւոր է, նաեւ Կիպրոսին:

Մի առիթով մենք հիմնաւորել ենք կասպ-վրկան նոյնացման տեսակէտը¹⁴, եւ ելնելով Բեհիսթունի արձանագրութեան այն յիշատակումից, թէ Պարթեաստանում եւ Վրկանում ապստամբութիւնը ճնշելուց յետոյ Դարեհը յայտարարում է, որ այդ է իր կատարածը Պարթեաստանում¹⁵, նշանակում է, որ Վրկանը մտել է Պարթեաստանի կազմի մէջ: Սրանից կարելի է եզրակացնել, որ Պարթեաստանը համապատասխանում է նաեւ ԺԱ. սատրապութեան տարածքին (չնայած, որ Դարեհի վարչական վերակառուցումներից յետոյ այդ նոյնացումն արդէն բացառում է): Նոյն տրամաբանութեամբ Արախոսիան պէտք է հանդէս գար ինչ-որ երկրի անուան տակ եւ այդ երկիրը Սատտագիւտիան է: Դարեհը Սաթագուշը յայտարարում է ապստամբ երկրների թում¹⁶, սակայն Սաթագուշի մասին այլ տեղեկութիւններ չի հաղորդում եւ, ընդհակառակը, խօսում է Արախոսիայում տեղի ունեցած ապստամբական գործողութիւնների մասին, որտեղ Վահեագղատան բանակ էր ուղարկել Արախոսիայի սատրապ Վիուանայի դէմ կռուելու համար¹⁷: Ճիշտ է, Դարեհը Արախոսիայում ապստամբութիւնը ճնշելուց յետոյ յայտարարում է, որ այդ է իր կատարածը Արախոսիայում (այսինքն՝ կարելի էր սպասել Սաթագուշում, ինչպէս Պարթեաստանի դէպքում), սակայն կարելի է ենթադրել, որ Արախոսիան եւս աշխարհագրորէն համապատասխանում է Է. սատրապութեանը, ինչպէս Սատտագիւտիան, Գանդարան, եւ, ըստ էութեան, Դարեհը Արախոսիան թողեց այս սատրապութեան կազմում: Համեմատութեան համար նշենք, որ Բակտրիան էլ չի յիշատակում Դարեհի դէմ ապստամբած երկրների շարքում, բայց Մարգիանայում ապստամբու-

թիւնը ճնշելուց յետոյ Դարեհը յայտարարում է, որ այդ է իր կատարածը Բակտրիայում¹⁸: Միաժամանակ, հարկ է նշել, որ Բակտրիայի կազմում հանդէս եկող Մարգիանան նոյնպէս չի յիշատակում Հերոդոտոսի կողմից: Մական նոյնացրեցինք ԺԷ. սատրապութեանը, բայց բացառուած չէ, որ Մական համապատասխանէր նաեւ ԺԴ. սատրապութեան միւլերին:

Մեր քննութեան համար կարելո՞ր են նաեւ Հերոդոտոսի հետեւեալ տեղեկութիւնները: Պատմիչը, նշելով հարկատու ցեղերին ու ժողովուրդներին, գրում է, որ «*ահա այս հարկերն էին գալիս Դարեհին Ասիայից եւ Լիբիայի մի փոքր հատուածից: Ժամանակ անց հարկ է ստացում նաեւ կղզիներից ու Եւրոպայում մինչեւ Թեսսալիա* (ընդգծումը մերն է - Յ.Խ.) *սայրողներից*»¹⁹: Այս վերջին տեղեկութեան մէջ «ժամանակ անց»ը ցոյց է տալիս, որ մինչ յունական կղզիների, Թրակիայի ու Մակեդոնիայի նուաճումը, Դարեհ Ա.ի վարչական վերափոխումներն արդէն կատարուած իրողութիւն էին, եւ այդ իրողութիւնն արտացոլուած էր Հերոդոտոսի մօտ պահպանուած սատրապութիւնների ցուցակում: Յունական կղզիները՝ Սամոսը, Լեմնոսը, Քիոսը, նուաճուել են մօտ Ք.ա. 517ին, եւ մօտաորայէս Ք.ա. 517ին նուաճուել է նաեւ Հնդկաստանի հիւսիսարեւմտեան մասը²⁰:

Մ. Ա. Դանդամաւեր Դարեհի վարչա-դրամականը²¹: Բեհիսթունի արձանագրութիւնն աւարտուել է Ք.ա. 518ին²², որտեղ Հնդկաստանը, Մակեդոնիան, Թրակիան յիշատակուած չեն: Հնդկաստանը յիշատակում է Դարեհ Ա.ի Պերսեպոլիսեան Ե. կոչուած արձանագրութիւնում²³, իսկ Դարեհ Ա.ի Նաղշէ Ռոստամի Ա. կոչուած արձանագրութիւնում արդէն Հնդկաստանը եւ Մակեդոնիան ու Թրակիան ընդգրկող Սկուդրաս սատրապութիւնը յիշատակում են միասին²⁴: Սա նշանակում է, որ Դարեհի կողմից Հնդկաստանի նուաճումը աւելի վաղ է տեղի ունեցել, Եզեական ծովի նշուած կղզիների հետ միաժամանակ, քանի որ վերջիններս ներկայանում են «Ionians who are of the mainland»²⁵ արտայայտութեան տակ: Մեր կարծիքով, Նաղշէ Ռոստամի արձանագրութիւնը արտացոլում է Դարեհին հպատակ երկրների ամբողջական պատկերը, եւ թերեւս այս պատկերը հիւսիսմերձսեւեծովեան սկիւթների դէմ Դարեհի կատարած արշաւանքին²⁶ յաջորդած պատմական իրողութիւնն էր: Իսկ սա արդէն նշանակում է, որ ո՛չ Բեհիսթունի, ո՛չ Նաղշէ Ռոստամի եւ ո՛չ էլ ընդհանրապէս միւս հին պարսկական արձանագրութիւնները չեն արտացոլում Աքեմէնեան Պարսկաստանի վարչական բաժանման համակարգը: Եթէ Հնդկաստանը նուաճուել է Ք.ա. 517ի մօտերքը, այսինքն՝ Բեհիսթունի արձանագրութիւնը գրուելուց յետոյ, եւ արդէն իսկ որպէս առանձին սատրապութիւն առկայ է սատրապութիւնների հերոդոտեան ցուցակում, նշանակում է, որ Դարեհի վարչական վերափոխումներն իրագործուել են մինչեւ հիւսիսմերձսեւեծովեան սկիւթների դէմ կատար-

ուած արշաւանքը, քանի որ հենց Հերոդոտոսը, թուարկելով սատրապութիւնները, վերջում աւելացնում է, որ ժամանակ անց հարկեր են ստացում նաեւ կղզիներից եւ Եւրոպայի մի մասից:

Ք.ա. մօտ 512ին Մակեդոնիան եւ Թրակիան կազմում են մէկ սատրապութիւն՝ Սկուդրա անուանումով²⁷, այն դէպքում, երբ համապետական բնոյթի վարչական վերափոխումներն արդէն կատարուել էին: Աւելի ուշ նոյնպէս տեղի էին ունենում վարչական փոփոխութիւններ պետութեան ներսում: Այսպէս, օրինակ, Դարեհ Ա.ի ժամանակ Փոքր Ասիան բաժանուած էր 4, իսկ Դարեհ Գ.ի օրօք՝ 7 սատրապութիւնների: Դարեհ Ա.ի մահից շատ չանցած Վրկանն անջատուում է Պարթեւաստանից եւ վերածւում առանձին սատրապութեան: Ք.ա. մօտ 508ին Գանդարան՝ որպէս առանձին սատրապութիւն, անջատուում է Բակտրիայից: Եղել է նաեւ հակադարձ երեւոյթը. Ք.ա. Դ. դարում Էրիրնարին եւ Կիլիկիան միաւորում են մէկ սատրապութեան մէջ²⁸: Հաւանաբար, նոր սատրապութիւնների առաջացումը եւ հների վերաձեւումը չէր ուղեկցում նոր եւ համապատասխան համակայտերական հրամանագրերով (կամ էլ այդ հրամանագրերը մեզ չեն հասել) եւ ունէր տեղական նշանակութիւն: Այդ իսկ պատճառով հերոդոտեան ցուցակի հիմքում ընկած վարչական վերակազմութեան վերաբերեալ պաշտօնական աղբիւրը Աքեմէնեան արքունիքի կողմից չի ենթարկուել լրացումների եւ փոփոխութիւնների, այսինքն՝ Դարեհից յետոյ հանդէս եկող գահակալները չեն ձեռնարկել համապետական մակարդակի վարչական վերափոխումներ: Սակայն, պետք է ուշադրութիւն դարձնել մի հանգամանքի վրայ, որտեղ, ըստ էութեան, կրկին արտացոլուած է Աքեմէնեան Պարսկաստանի սատրապական բաժանման պատկերը: Վերջինս, կարծում ենք, իր արտացոլումն է գտել Քսերքսէսի Հելլադա արշաւող բանակի նկարագրութեան մէջ, որի հիմքում, դատելով Հերոդոտոսի տեղեկութիւնից, ընկած է պարսկական պաշտօնական աղբիւրը, քանի որ ինչպէս հաղորդում է պատմիչը, Քսերքսէսի հրամանով եւ ուղղակի ներկայութեամբ, գրագիրները գրի են առնում արշաւանքին մասնակցող բոլոր ազգութիւնների անունները, որոնք տրամադրել էին ցամաքային եւ ծովային ռազմական ուժեր²⁹: Ստորեւ՝ արշաւանքին մասնակցող այն բոլոր ժողովուրդները³⁰, որոնք յիշատակուած են նաեւ սատրապական ցուցակում եւ տեսնենք այն փոփոխութիւնները, որոնք կը յայտնաբերուեն քննութեան ընթացքում:

Այսպէս, Հերոդոտոսը արեւմտեան ժողովուրդներից նախ յիշատակում է պափլագոնացիներին, որոնց նմանութեամբ զինուած էին լիգիացիները, մատիէնները, մարիանդիները, սիրիացիները: Այնուհետեւ ռազմական առումով փոխազգիներն ու արմէնները հանդէս են գալիս մէկ հրամանատարութեան ներքոյ: Լիւդիացիներն ու միւսիացիները յիշատակուում են Արտափրենէսի հրամանատարութեան տակ: Ասիայի

թրակացիներին առաջնորդում էր Արտաբանուսի որդի Բասսակէսը: Յետոյ նշում են պիսիդիացիները: Կարալներին եւ միլիացիներին առաջնորդում էր Բադրէսը, մոսքերին, տիբարէններին՝ Արիոմարդոսը, մակրոններին եւ մոսսինոյկներին՝ Արտայուկտէսը: Հետեւակ զօրքի մէջ յիշատակում են մարերը, կոլիները, ալարոդները, սասպէյրները, Կարմիր Ծովի կղզիաբնակները: Դատելով բանակի նկարագրութիւնից՝ իրաքանչիւր ցեղ յիշատակուած է տէրութեան մէջ ունեցած ըստ իր նշանակութեան: Ըստ այդմ էլ, նախ յիշատակուած են պարսիկները, այնուհետեւ մեդացիները, կիսսիացիները, հիւրկանները, ասորեստանցիները, իսալոյայները: Յաջորդաբար գալիս են բակտրիացիները, սակերը, հնդիկները, արիները, պարթեւները, քորասմները, սոգդերը, գանդարները, դադիկները, կասպերը, սարանգները, պակտիւացիները, ուտիները, միւկերը, պարիկանիները, արաբները եւ Եգիպտոսից վերեւ բնակուող եթովպացիները, հնդիկներին միացուած արեւելեան եթովպացիները, լիբիացիները: Բանակի հեծելազօրը կազմուած էր պարսիկներից, պարսիկների կողքին կանգնած սագարտիներից, մեդացիներից, կիսսիացիներից, հնդիկներից, բակտրիացիներից, կասպերից, լիբիացիներից, պարեկանիներից, ուղտեր նստած արաբներից: Նաւատորմը կազմուած էր փինիկեցիներից, Պաղեստինի սիրիացիներից, եգիպտացիներից, կիպրոսցիներից, կիլիկեցիներից, պամփիլիացիներից, լիւկիացիներից, Ասիայի դորիացիներից, կարիացիներից, հոնիացիներից, [Եգէական Ծովի] կղզիաբնակներից, էոլիացիներից, հելլեսպոնտոսցիներից: Ըստ Հերցֆելդի՝ Հերոդոտոսի տեղեկութիւնները Քսերքսէսի բանակի մասին հիմնուած են մի աղբիւրի վրայ, որտեղ համատեղուել են մի կողմից ժողովուրդների անունները, ջոկատների թուաքանակը եւ հրամանատարների անունները պարունակող պարսկական ցուցակը, միւս կողմից՝ ականատեսների վկայութիւնները, որոնք տալիս են հագուստի եւ սպառազինութեան նկարագրութիւնը: Քսերքսէսի բանակի մասին տեղեկութիւնները համեմատելով հարկատու շրջանների ցուցակի եւ պարսից արքաների արձանագրութիւնների հետ, որոնք վերաբերում են միջինասիական ժողովուրդներին, տեսնում ենք, որ զօրքերի թուարկման մէջ կան որոշ տարբերութիւններ: Այսպէս, վրկանները, որոնք չեն յիշատակում սատրապութիւնների ցուցակում, առանձնացուած են որպէս առանձին ջոկատ, բակտրիացիները միացուել են սակերին, չեն յիշատակում որոշ ցեղեր: Այս անհամապատասխանութիւնները կարելի է բացատրել այն փոփոխութիւններով, որոնք տեղի էին ունեցել Ք.ա. շուրջ 480ին (օրինակ, ցեղերի անջատուելը, սատրապութիւնների վերակազմումը եւն.)³¹:

Անշուշտ, Քսերքսէսի բանակի մասին տեղեկութիւնները հիմնուած են պարսկական պաշտօնական աղբիւրի վրայ, սակայն, ի տարբերու-

թին սատրապութիւնների նկարագրութեան, բանակի մասին տեղեկութիւններում Հերոդոտոսը դրսեւորում է որոշ կամայական մտեցումներ, այսպէս ասած, որոշ հաղորդումներում կատարելով յաւելումներ եւ ճշգրտումներ՝ ի ցոյց դնելով իր բանիմացութիւնը: Օրինակ, ըստ պատմահօր, փոիզիացիներն ու արմէները հանդէս են գալիս մէկ հրամանատարութեան ներքոյ, ընդ որում, ինչն յաճախ է հանդիպում Հերոդոտոսի մօտ, վերջինս պատմական ակնարկի տեսքով ներկայացնում է փոիզների, այսպէս ասած, նախապատմութիւնը եւ շատ արագ անցում կատարում արմէներին՝ նշելով, որ վերջիններս փոիզիական վերաբնակիչներ էին եւ զինուած՝ փոիզների նման³²: Հեղինակի այս տեղեկութեանը մի առիթով մենք արդէն անդրադարձել ենք եւ նշել, որ Կեսար-իա-Մաժակի շրջանում հաստատուած մուշքերին, որոնք երկար ժամա-նակ գտնուել են Հայաստանի քաղաքական տիրապետութեան ծայր արեւմուտքում, եւ որոնց, ըստ պատմահայր Խորենացու, Արամ Նահապետը ստիպել էր սովորել հայերէն եւ դարձրել իր ժողովուրդը, յունական աշխարհը, իրօք, կարող էր համարել փոիզիական վերաբնակիչներ, որոնց հետ էին նախ եւ առաջ շփուել յոյները: Հետեւաբար, Հերոդոտոսի արմէները հենց այս մուշքերն են, եւ խօսքը սոսկ պատմական յիշողութեան մասին է³³:

Քսերքսէսի բանակի նկարագրութեան մէջ կայ մի հետաքրքիր իրողութիւն, ինչը թոյլ է տալիս կատարել որոշ հետեւութիւններ: Այսպէս, այն բոլոր ժողովուրդները, որոնք Հերոդոտոսի կողմից նշուած են իբրեւ Աքեմէնեան Պարսկաստանի վարչական համակարգից դուրս գտնուող այսպէս կոչուած ապահարկ երկրներ կամ ցեղեր, Քսերքսէսի բանակում յիշատակուում են իրենց զօրամասերով: Այդ ժողովուրդներն են պարսիկները, եթովպացիները, արաբները, կոլխերը: Մեզ համար այս հարցում կարեւորն այն է, որ ծայրամասային ցեղերի՝ եթովպացիներ, արաբներ, կոլխեր, յիշատակումով ցոյց է տրւում Աքեմէնեան Պարսկաստանի սահմանները Քսերքսէսի կառավարման ժամանակում:

Քսերքսէսի բանակի նկարագրութիւնը կարելի է համեմատել նոյն թագաւորի «Persepolis h» արձանագրութեան հետ, որտեղ թուարկուում են հետեւեալ երկրները. «Māda : Ūja : Harauvatiš : Armina : Zraka : Parθava : Haraiva : Bāxtriš : Sugda : Uvārazmiš : Bābiruš : Aθurā : θataguš : Sparda : Mudrāya : Yaunā : tya : drayahiyā : dārayatīy : utā : tyaiy : paradraya : dārayatīy : Maciyā : Arabāya : Gadāra : Hiduš : Katpatuka : Dahā : Sakā : haumavargā : Sakā : tigraxaudā : Skudrā : Ākaufaciya : Putāyā : Karkā : Kūšiya»³⁴: Այս արձանագրութեան համեմատութիւնը *DNa*ի հետ, որտեղ Աքեմէնեան Պարսկաստանի տարածքն առաւել ամբողջական է արտացոլուած, բացայայտում է աշխարհագրական երկու նոր անուանումների ի յայտ գալը՝ Ākaufaciya (man of Akaufaka) եւ Dahā: Ākaufaciya բառի մէջ ān մեր կարծիքով ժխտական նախածանց է, իսկ kaufa- նշանակում է «լեռ, սար» + –

iyā- ցեղանուանակերտ վերջածանց³⁵: Թրակիայի եւ Լիբիայի միջեւ յիշատակուող *Ākaufaciya*ն տեղադրել յստակ մի վայրում՝ դժուար կը լինի: Փորձ է արուել տեղադրել այն ԺԷ. սատրապութեան կազմում՝ Աքեմէնեան Պարսկաստանի հարաւ-արեւելքում³⁶: Մենք առաջարկում ենք այլ տեղադրութիւն, որը բխում է Հերոդոտոսի տեղեկութիւնների տրամաբանութիւնից: Սատրապութիւնների ցուցակում յիշատակուող մատիէնները, սասպէրները, ալարողները հանդէս են գալիս ԺԸ. սատրապութեան կազմում, իսկ Քսերքսէսի բանակի նկարագրութեան մէջ ալարողները եւ սասպէրները միատրուած են մէկ հրամանատարութեան ներքոյ: Թերեւս ԺԸ. սատրապութիւնը, որն ըստ վերջին ուսումնասիրութիւնների գտնուել է Կուրից հիւսիս մինչեւ Կովկասեան մեծ լեռնաշղթան, արեւմուտքում սահման ունենալով Սուրամի լեռները³⁷, համապատասխանում է Քսերքսէսի Պերսեպոլիսեան Լ. կոչուած արձանագրութեան՝ *Ākaufaciya*ին, որը, մեր կարծիքով, նշանակում է «ոչ-լեռնցի», այսինքն՝ դաշտային, հարթավայրային երկրի բնակիչ, իսկ աւելի ուշ ժամանակաշրջանում յայտնի Ադուանք-Ալբանիան լիովին կարող էր յաւակնել նմանօրինակ բնորոշմանը: Եթէ *Ākaufaciya* նշանակում է միայն «լեռնցի», ապա նոյնիսկ այդ դէպքում մեր տեղադրութեան սահմանները գրեթէ չեն խաթարուի, քանի որ էթնիկական այդպիսի բնութագրման պարագայում կ'ընդլայնուեն մեր առաջարկած տեղադրութեան աշխարհագրական սահմանները, եւ *Ākaufaciya*ի անուան տակ կը ներկայացնենք Կովկասեան մեծ լեռնաշղթայի ողջ տարածաշրջանում՝ ներառեալ ԺԹ. սատրապութիւնում (աւելի ստոյգ՝ արեւելեան հատուածում) ապրող ցեղերին, իսկ Կովկասը, ըստ Հերոդոտոսի, Աքեմէնեան Պետութեան հիւսիսային սահմանն էր³⁸: Եւ տրամաբանական է, որ Կովկասի այս կամ այլ կերպ արտացոլումը արձանագրութիւնում ամբողջութեամբ համապատասխանում է Աքեմէնեան Պարսկաստանի վարչական համակարգին վերաբերող միւս աղբիւրների տեղեկութիւնների համադրմանը: Ինչ Վերաբերում է *Dahā*ին, ապա սա անտիկ աղբիւրներում յայտնի դահերն են (*Δάαι, Δάοι, Dahae*)³⁹: Ընդունուած է դահերին համարել սկիւթական ժողովուրդներից մէկը, սակայն չի բացառուում, որ դահերը հենց Հերոդոտոսի յիշատակած պարսկական դայեր ցեղն է, որը հեղինակի կողմից բնորոշում է որպէս վաչկատուն ցեղ⁴⁰: Բնականաբար, այս պարագայում դահերը կարող էին յայտնուել Կասպից Օովի հարաւարեւելեան ափերին, եւ թերեւս դահերի նախնական բնակութեան շրջանից հետո աշխարհագրական այլ միջավայրում հենց յայտնուելն էլ նրանց յիշատակելու պատճառն էր: Քսերքսէսից յետոյ Աքեմէնեան արքաներին ենթակայ երկրները կամ ժողովուրդները յիշատակում են միայն Արտաքսերքսէս Բ.ի կամ Գ.ի Պերսեպոլիսի արձանագրութիւնում, որը մէջբերում ենք ամբողջութեամբ. «*1 iyam : Pārša : 2 iyam : Māda : 3 iyam*

: *Ūvja* : 4 *iyam* : *Parθava* : 8 *iyam* : *Uvārazm'ya* : 9 *iyam* : *Zrakā* : 10 *iyam* : *Harauvatiya* : 11 *iyam* : *Θataguiya* : 12 *iyam* : *Gadāraya* : 13 *iyam* : *Hiduya* : 14 *iyam* : *Sakā* : *haumavargā* : 15 *iyam* : *Sakā* : *tigraxaudā* : 16 *iyam* : *Bābiruš* : 17 *iyam* : *Aθuriya* : 18 *iyam* : *Arabāya* : 19 *iyam* : *Mudrāya* : 20 *iyam* : *Arminiya* : 21 *iyam* : *Katpatuka* : 22 *iyam* : *Spardiya* : 23 *iyam* : *Yaunā* : 24 *iyam* : *Sakā* : *paradrāiya* : 25 *iyam* : *Skudra* : 26 *iyam* : *Yauna* : *takabarā* : 27 *iyam* : *Putāya* : 28 *iyam* : *Kūšāya* : 29 *iyam* : *Maciya* : 30 *iyam* : *Karka* : »⁴¹: Այստեղ թուարկուած երկրները հանդէս են գալիս հետեւեալ սատրապութիւնների կազմում. մեդացիները՝ Ժ., էլամացիները՝ Ը., պարթեւները, քորասմները, արէյները, սոգդերը՝ ԺԶ., բակտրիացիները՝ ԺԲ., սարանգները՝ ԺԴ., միւլերը՝ կա՛ւ ԺԵ., կա՛ւ ԺԶ., սատտագիւտները, գանդարիները՝ Է., հնդիկները՝ Ի., *Αθυραίν*՝ Ե., բաբելոնացիները՝ Թ., եգիպտացիները, լիբիացիները՝ Ջ., հայերը՝ ԺԳ., կապադովկիացիները՝ Գ., սարդեսցիները՝ Բ., հոնիացիները՝ Ա.: Հերոդոտեան ցուցակի 20 սատրապութիւններից 13ի առկայութիւնն այս արձանագրութիւնում ակնյայտ է, իսկ մնացածների մասին մեր քննութիւնը հետեւեալն է: Արտաքսերքսէս Բ.ի կամ Գ.ի Պերսէպոլիսեան արձանագրութիւնն ամբողջութեամբ համապատասխանում է Դարեհ Ա.ի Նաղշէ Ռոստամի Ա. կոչուած արձանագրութեանը: Այն երկրների ու ցեղերի յիշատակութեան հերթականութեան չնչին տարբերութեամբ կրկնում է Դարեհ Ա.ի Սուգայի Ե . կոչուած արձանագրութիւնը: Անկախ այն հանգամանքից, թէ Արտաքսերքսէս Բ.ի կամ Գ.ի Պերսէպոլիսեան արձանագրութիւնն ու՛մ է պատկանել՝ Արտաքսերքսէս Բ.ի՛ն (Ք.ա. 404-358) թէ՛ Գ.ին (Ք.ա. 358-338), միանշանակ է, որ նշուած երկու տիրակալների ժամանակ էլ Աքեմէնեան Պարսկաստանը յայտնուել էր ներքին եւ արտաքին ծանր կացութեան մէջ, եւ նրանց եռանդուն ջանքերի շնորհիւ պետութիւնը վերականգնում է իր նախկին հզօրութիւնը⁴²: Նշուած երկու արձանագրութիւնների աշխարհագրական եւ քանակական համապատասխանութիւնը բացատրում է նրանով, որ ե՛ւ Արտաքսերքսէս Բ.ն, ե՛ւ Արտաքսերքսէս Գ.ն ակնյայտօրէն «իրաւունք» ունէին իրենց գործունէութիւնը համեմատել նախնի մեծն Դարեհ Ա.ի հզօրութեան հետ, քանի որ նրանց օրօք (այդ «իրաւունքը» իրաւացիօրէն իւրաքանչիւրին էլ կարող է վերաբերել) Աքեմէնեան Պարսկաստանը շարունակում էր մնալ նախկին սահմաններում:

Այժմ անցնենք մնացած երկրների տեղադրութեան հարցի քննութեանը եւ տեսնենք, թէ տուեալ երկրները ո՛ր սատրապութիւնների կազմում կարող էին հանդէս գալ: Ի սկզբանէ պարզ է, որ մի քանի երկրներ կամ ժողովուրդներ, ինչպէս օրինակ ԺԶ. սատրապութեան պարագայում, կարող էին ընդգրկուել մէկ սատրապութեան մէջ: *Arabāyah* հարցում անհրաժեշտ են պատմաաշխարհագրական էական ճշգրտումներ: Արաբների երկիրը սատրապութիւնների ցուցակում յիշատակում է որ-

պէս ապահարկ, այն դէպքում, երբ դատելով Հերոդոտոսի տեղեկութիւններին՝ արաբները եւ միւս, այսպէս կոչուած, ապահարկ երկրները մտել են պետութեան մէջ՝ ունենալով որոշակի պարտաւորութիւններ, ինչպէս մնացած ժողովուրդները: Պատմիչը խիստ որոշակի նշում է, որ արաբները, կոլիւերը, եթովպացիները ընծաներ ուղարկում են հարկերից բացի⁴³: Քսերքսէսի բանակի նկարագրութիւնից յստակ երեւում է, որ հազիւ թէ վերոյիշեալ ապահարկ ժողովուրդների մասնակցութիւնը յունական արշաւանքին բարի կամքի դրսեւորում լինէր: Արաբիայի հարցում անտիկ աղբիւրների որոշ տեղեկութիւնների համադրումը բացայայտում է մի կարեւոր իրողութիւն: Այսպէս, Քսենոփոնը *Անարասիս*ում հաղորդում է, որ Սիրիայի միջով 50 փարսախ ընթանալով՝ խռովարար բանակը հասնում է Արաքսէս գետին⁴⁴, որը Եփրատի ձախակողմեան վտակներից մէկն է, թերեւ Խարուրը: Նախ, այս տեղեկութիւնից պարզւում է, որ Ե. սատրապութիւնը՝ *Αθυσρα*, տարածուել է նաեւ Եփրատի ձախափնեակում, որից հարաւ եւ հարաւ-արեւելք Արաբիան էր: Իսկ գրքի վերջում էլ, զօրավար-պատմիչը, թուարկելով անցած երկրների տիրակալներին, յիշատակում է երկու կարեւոր տեղեկութիւններ. Փիւնիկիայի եւ Արաբիայի տիրակալն էր Դեոնէսը, Սիրիայի եւ Ասսիրիայի՝ Բելեսիւսը⁴⁵: Սիրիան, Փիւնիկիան, Կիպրոսը Դարեհ Ա.ի օրօք կազմել են մէկ սատրապութիւն, երբ Կիւրոսի ժամանակ՝ Ք.ա. 535ին, Սիջագետքը եւ Անդրգետքը, այսինքն՝ Եփրատից արեւմուտք ընկած Սիրիան, Փիւնիկիան, Պաղեստինը, կազմել են մէկ նահանգ, որը մօտ 516ին բաժանւում է երկու մասի՝ Սիջագետք եւ Անդրգետք (Էբիր-նարի), իսկ արդէն Դ. դարում Անդրգետքը եւ Կիլիկիան միաւորւում են մէկ սատրապութեան մէջ⁴⁶: Ինչ վերաբերում է Քսենոփոնի վերջին տեղեկութեանը, կարելի է ենթադրել, որ Ք.ա. Ե. դարի վերջին Ե. սատրապութիւնը բաժանուել էր երկու հատուածների՝ Սիրիա, Ասսիրիա եւ Փիւնիկիա, Արաբիա, կամ էլ, ինչը լիովին հնարաւոր է, Դեոնէսը եղել է փոխկառավարիչ⁴⁷:

Սիրիան եւ Ասսիրիան՝ որպէս վարչական միաւոր, յիշատակւում են նաեւ Արիանոսի մօտ, համաձայն որի, Գաւգամելայի ճակատամարտին Մազէր առաջնորդում էր «Կոյլէ-Սիրիայի եւ երկու գետերի միջեւ ընկած Սիրիայի սիրիացիներին»⁴⁸: Այս տեղեկութիւնը նշանակում է, որ Ե. սատրապութեան թերեւս ենթաշրջան հանդիսացող Կոյլէ-Սիրիա⁴⁹ - Սիրիան (իմա՝ *Αθυσρα*) Աքեմէնեան տէրութեան անկման պահին դեռեւս մնում էր, ինչպէս Ք.ա. Ե. դարի վերջին, վարչական մէկ միաւոր՝ հիւպարքիա: Արաբների մասին պահպանուած տեղեկութիւնները թոյլ են տալիս կատարել հետեւեալ եզրակացութիւնները: Այսպէս, Հերոդոտոսը յայտնում է, որ Պսամմետիքոս թագաւորի օրօք կայազօրներ հաստատուեցին եթովպացիների դէմ Ելեփանտինէ քաղաքում, արաբների եւ ա-

ստրեստանցիների դեմ՝ Դափնեում, որը Պելուսիայում է, եւ Լիբիայի դեմ՝ Մարիայում⁵⁰: Մէկ այլ տեղեկութեան մէջ պատմիչը հաղորդում է, որ արաբների եւ ասորեստանցիների թագաւոր Սանաքարիբը (իմա՝ Սենեքերիմ) արշաւում է Եգիպտոս⁵¹: Մէջբերուած երկու տեղեկութիւնները թոյլ են տալիս կատարել երկու հետետութիւններ. արաբները Եգիպտոսի ծայր հիւսիս-արեւելքում, Պելուսիայի շրջանում սահմանակցել են Եգիպտոսին, կամ էլ ասորեստանցիների հետ արաբների համատեղ յիշատակուելը ցոյց է տալիս, որ խօսքը գնում է ասորեստանցիներից եւ արաբներից կազմուած պետական կազմաւորման մասին: Սակայն Հերոդոտոսի միւս տեղեկութիւնները հնարաւորութիւն են տալիս առաջնութիւնը տալ առաջին եզրակացութեանը, քանի որ պատմիչի միւս տեղեկութիւններից պարզուում է, որ արաբներն իրօք Պաղեստինեան Սիրիա կոչուած երկրի առափնեայ փոքր հատուածում դուրս են եկել Միջերկրական ծով: Համաձայն Հերոդոտոսի՝ Կադիտիս քաղաքից մինչեւ Ենիւտոս քաղաքը ընկած ծովափնեայ նաւահանգիստները պատկանում են արաբներին⁵²: Ընդ որում, Փիւնիկիայից մինչեւ Կադիտիս քաղաքը պաղեստինեան սիրիացիների երկիրն է⁵³: Կադիտիս քաղաքը համապատասխանում է Գազային, իսկ պաղեստինեան սիրիացիները՝ փղշտացիներին: Եգիպտոսի եւ Սիրիայի սահմանը կազմել է Կասիոն լեռը, որը ձգուել է Մերթնիս լճի մօտով⁵⁴: Ենիւտոսից մինչեւ Մերթնիս լիճը Հերոդոտոսը կրկին համարում է սիրիական հողեր⁵⁵: Կասիոն լեռը եւ Մերթնիս լիճը Պելուսիայից արեւելք՝ որպէս Եգիպտոսի մասեր, յիշատակուում են նաեւ Ստրաբոնի մօտ⁵⁶: Ստրաբոնը նոյնպէս որոշ դէպքերում Կասիոն լեռը կամ համարում է Փիւնիկիայի մաս, կամ էլ Փիւնիկիային անմիջականօրէն սահմանակից⁵⁷, ինչն, ըստ երեւոյթին, պայմանաւորուած է Ստրաբոնի կողմից աւելի վաղ շրջանից եկող աղբիւրների օգտագործմամբ: Մէկ այլ կապակցութեամբ էլ Սիրիայի առափնեայ հատուածը համարուել է արաբական երկիր, որը բնակեցրել են սիրիացիները⁵⁸: Սա այն հատուածն է, որը գտնուել է Կադիտիսի եւ Ենիւտոսի միջեւ:

Կադիտիսի կամ Գազայի մասին հետաքրքիր տեղեկութիւններ ունի նաեւ Արիանոսը, թէ՛ Գազան Փիւնիկիայից Եգիպտոս տանող ճանապարհի վերջին քաղաքն է, անապատի սկզբին, որի կառավարիչ Բատը, հաւաքելով վարձկան արաբների, ուժեղ դիմադրութիւն է ցոյց տալիս Ալեքսանդրին: Միեւնոյն ժամանակ Արիանոսը Գազան համարում է Պաղեստինեան Ասորիքի քաղաքներից մէկը⁵⁹: Ռուփոսը նոյնպէս գրում է, որ Գազայում մակեդոնացիներին դիմադրում են պարսիկները եւ արաբները⁶⁰: Ինչպէս երեւում է Արիանոսի ուղղակի եւ Ռուփոսի անուղղակի տեղեկութիւններից, Գազան հանդիսացել է Փիւնիկիայի սահմանային քաղաքը, որից յետոյ Եգիպտոսն էր: Պարզուում է, որ

վարչական առումով Պաղեստինեան Սիրիան մտել է Փիւնիկիայի մէջ, այն դէպքում, երբ դատելով Հերոդոտոսի սատրապութիւնների մասին տեղեկութիւններից՝ Պաղեստինեան Սիրիան նախապէս եղել է Ե. սատրապութեան ենթաշրջաններից մէկը: Ընդ որում, Փիւնիկիան եւ թերեւս Արաբիան, ինչպէս Քսենոփոնի օրօք, Ք.ա. 7. դարի վերջերին եւս շարունակում էին մնալ որպէս առանձին վարչական միաւոր: Ռուփոսի մի տեղեկութիւնից էլ յայտնի է դառնում, որ Տիրոս քաղաքի պաշարման ժամանակահատուածում Ալեքսանդրը զօրքի մի մասով արշաւում է Արաբիա, այն դէպքում, երբ Արիանոսի հաղորդումից պարզւում է, որ Ալեքսանդրը արշաւանք է կազմակերպում այն Արաբիայի դէմ, որը գտնւում էր Անտիլիբանանեան կոչուող լեռան մօտ⁶¹: Անտիլիբանանեան կոչուող լեռները գտնուել են Սիդոնի մօտ, որոնք Լիբանանեան լեռների հետ ձգուել են մինչեւ Արաբական լեռները, որոնք բարձրանում են Դամասկոսեան լեռների վրայ⁶²: Մէկ այլ տեղում էլ Ռուփոսը յիշատակում է այսպէս կոչուած Լիբանանեան լեռները, որտեղ վայրի արաբները յարձակուել եւ սպանել էին երեսուն մակեդոնացիների⁶³: Բերուած տեղեկութիւնների համադրումից պարզւում է, որ Արաբիան կամ աւելի ստոյգ՝ նրա մի մասը, գտնուել է Դամասկոսի հարեւանութեամբ, ընդ որում, կարելի է եզրակացնել, որ Աքեմէնեան Պարսկաստանի համար ստեղծուած ծանր կացութեան պայմաններում արաբները շարունակելով մնալ որպէս դաշնակիցներ կամ վարձկաններ, օգնում են պարսիկներին, եւ միայն Ալեքսանդրի անմիջական ճնշման տակ նրանց այն հատուածը, որը գտնւում էր Դամասկոսից արեւելք, ենթարկւում է մակեդոնացիներին: Դամասկոսը Աքեմէնեան տերութեան կարեւորագոյն քաղաքներից մէկն էր⁶⁴, որտեղ գտնուել է նաեւ պետական գանձարաններից մէկը: Ռուփոսը Դամասկոսը յիշատակում է որպէս Ասորիքի քաղաքներից մէկը, սատրապական նստավայր⁶⁵:

Ստացւում է, որ Արաբիան, մեր կարծիքով, տեղադրւում է Պալմիրայի շրջանում, եւ այս առումով Քսենոփոնի այն տեղեկութիւնը, թէ Կիրոս Կրտսերի բանակը Արաքսէս գետն (հաւանաբար Խաբուրն է) անցնելուց յետոյ ճանապարհը շարունակում է Արաբիայի միջով⁶⁶, սխալ չէ եւ համապատասխանում է տուեալ ժամանակի իրողութեանը: Արաքսէս գետից անդին յիշատակուած Արաբիան աշխարհագրորէն համապատասխանում է ուշ ժամանակաշրջանի հին հեղինակներից Ստրաբոնի սկենիտ կոչուած արաբների բնակութեան տարածքների մասին տեղեկութիւններին⁶⁷, որոնց ներթափանցումը Եփրատի ձախափնեակ սկըսուել էր դեռեւս Աքեմէնեան դարաշրջանում: Ընդ որում, դատելով Քսենոփոնի որոշ տեղեկութիւններից, հենց Արաբիայով յոյների անցումն էլ պայմանաւորել է այն վկայութեան յիշատակութիւնը, թէ Փիւնիկիան եւ Արաբիան եղել են մէկ վարչական միաւոր: Քսենոփոնը նշում է, որ Կի-

լիկիայի եւ Միրիայի սահմանն այն դարպասն էր⁶⁸, որն աւելի ուշ յայտնի է Ամանոսեան Դրունք անունով: Այստեղից Կիրոսի բանակը հինգ փարսախ շարժում է մինչեւ փինիկեցիներով բնակեցուած Միրիանդոս ծովափնեայ քաղաքը, եւ փաստօրէն ճանապարհի մնացած ուղին մինչեւ Արաքսէս գետը Քսենոփոնը համարում է Միրիա⁶⁹: Փինիկեցիների յիշատակումը տուեալ հատուածում միանշանակ հիմք չի կարող լինել այն պնդման՝ թէ Փինիկիայի սահմանը հիւսիսում այդքան ընդարձակուել էր: Սա պարզապէս նշանակում է, որ Միրիանդոսը փինիկեցիների կողմից հիմնադրուած քաղաք էր Փինիկիայի սահմաններից դուրս: Ասուածից ենթադրում ենք, որ Կիրոսի բանակը բնաւ չի անցել Փինիկիայով, եւ հենց Արաքիայի տարածքով անցնելուց յետոյ միայն Քսենոփոնը յիշատակում է Փինիկիայի եւ Արաքիայի կառավարիչ Դեռնէսին՝ որպէս մէկ վարչական միաւորի տիրակալ:

Փաստօրէն հին պարսկական սեպագիր արձանագրութիւնների Արաքիա երկիրը համապատասխանում է Դամասկոսից արեւելք՝ մինչեւ Եփրատի ձախափնեակ ընկած տարածքին, որը պայմանաւորուած էր Աքեմէնեան արքաների՝ արաբների նկատմամբ տարուող յատուկ քաղաքականութեան: Արաբների հաւատարմութիւնը պարսից արքաներին, ինչպէս տեսանք վերեւում, երեւաց նոյնիսկ պետութեան կործանման ժամանակաշրջանում: Ընդ որում, այս Արաքիան՝ որպէս վարչական միաւոր, ունէր իր տնտեսական եւ ռազմական յստակ պարտաւորութիւնները պետութեան նկատմամբ, ինչպէս միւս սատրապութիւնները: Սակայն, ըստ էութեան, կար նաեւ մէկ այլ Արաքիա, որն արաբներ էթնանուան ներքոյ դաշնակցային յարաբերութիւնների մէջ էր Աքեմէնեան Պետութեան հետ: Այս արաբներին մենք կ'անուանենք հարաւային՝ ի տարբերութիւն հիւսիսայինի:

Վերեւում ցոյց տուեցինք, որ արաբները Կադիտիսի եւ Ենիւսոսի միջեւ դուրս էին եկել Միջերկրական Ծով, ընդ որում արաբների քաղաքական իշխանութիւնը այդ հատուածում պայմանաւորուած էր առեւտրական նկատառումներով, եւ թերեւս անմիջական առեւտրական հաղորդակցութիւնը մերձծովեան շրջանից նաբաթեական Պետրայի միջոցով շարունակուում էր Արաբական թերակղզու խորքերը: Հենց Կամբիւսէսն էլ Եգիպտոսը նուաճելու համար խնդրում եւ ստանում է այս շրջանների արաբների թագաւորի օգնութիւնը եւ անցնելով նրանց երկրով՝ նուաճում Եգիպտոսը⁷⁰: Այս օգնութեան շնորհիւ էլ արաբները, որոնք ըստ երեւոյթին նաբաթեացիք են⁷¹, համարուեցին պարսիկների դաշնակիցները եւ հաւանաբար պահպանեցին մինչ պարսիկների կողմից Եգիպտոսի նուաճումն ունեցած առեւտրական տիրապետութիւնը Միջերկրական Ծովի առափնեայ փոքր հատուածում, ինչը բխում էր նաեւ Աքեմէնեան Պետութեան շահերից: Եւ հենց այս արաբներին նկատի

ունի Հերոդոտոսը, երբ նշում է, որ Դարեհին, բացի արաբներից, ենթարկում էին Ասիայի բոլոր ժողովուրդները, որոնց երկիրը ապահարկ էր⁷²: Նկատի ունենալով, որ արեւելքում Եգիպտոսի սահմանը հասել է մինչև Սերբոնիս Լիճը, կարելի է ընդունելի համարել, որ արաբների իշխանությունը տարածում էր նաև Սինայի Թերակղզու վրայ, ընդ որում Ենիստսից մինչև Սերբոնիս Լիճը Հերոդոտոսը կրկին աշխարհագրական առումով համարում է սիրիական հողեր, որոնք տուեալ ժամանակում (Կամբիսեսի եգիպտական արշաւանքի ժամանակ) նոյնպէս պետք է գտնուէին քոչուր արաբների վերահսկողութեան տակ: Բերուած տեղեկութիւնների քննութիւնից պարզոււմ է, որ էթէ Հերոդոտոսի ժամանակ Փիւնիկիան հարաւում հասել է մինչև Սերբոնիս Լիճը եւ Կասիոն Լեռը, ապա Ալեքսանդրի արշաւանքի ժամանակ Ե. սատրապութեան հարաւային սահմանը հասնում էր մինչև Գագա, այսինքն՝ եգիպտական սատրապութիւնը հիւսիս-արեւելքում ընդարձակուել էր ի հաշիւ հարեւան սատրապութեան տարածքների: Այս բացատրութիւնն էլ իր հերթին ցոյց է տալիս, որ Սինայի Թերակղզին կամ գոնէ նրա հիւսիսային մասը սկզբում միացուած է եղել Ե. սատրապութեանը, իսկ յետոյ թերեւս Դ. դարի երկրորդ կէտերից՝ եգիպտական սատրապութեանը:

Ի մի բերելով վերը կատարուած քննութեան արդիւնքները՝ գալիս ենք այն եզրակացութեան, որ Աքեմէնեան Պարսկաստանի վարչական բաժանման համակարգի հիմքում դրուած էր տարբեր ժողովուրդների միաւորումով մէկ ամբողջութիւն՝ միութիւն ստեղծելու գաղափարը, որը շուրջ երկուհարիւր տարի պահպանուեց պասարգադների ցեղից սերող Աքեմէնեան տոհմի գլխաւորութեամբ: Միւսնոյն ժամանակ ցոյց տրուեց, որ Աքեմէնեան արքաների արձանագրութիւններում յիշատակուող երկրները չեն արտացոլում կայսրութեան վարչական բաժանման համակարգը եւ ներկայացնում են հպատակ երկրները, չնայած որ հենց այդ երկրները կազմում էին սատրապութիւնները եւ իրենց յիշատակութեամբ հիմնականում ներկայացնում են կայսրութեան գլխաւոր կամ հիմնական ժողովուրդներին: Պարզուեց, որ վարչական առումով Աքեմէնեան Պարսկաստանը բաժանուած էր 21 սատրապութիւնների, ընդ որում, ԻԱ.՝ Սկուդրա սատրապութիւնը ձեւաւորուել էր Դարեհի կողմից համապետական վարչական վերափոխումներ ձեռնարկելուց քիչ աւելի ուշ, ըստ այդմ էլ տեղ չի գտել Հերոդոտոսի ցուցակում:

ԾԱՆՕԹԱԳՐՈՒԹԻՒՆՆԵՐ

¹ "Satrap", *Pauly's Real-Encyclopädie der Classischen Altertumswissenschaft*, München, 1921, էջ 82-188:

² Հերոդոտոս, *Պատմութիւն Ինը Գրքից*, թրգմ. Ս. Կրկեաշարեան, Երևան, ՀՍՍՀ ԳԱ Հրատ., 1986, III, 89-97. նաև *Herodotus* (With an English translation by A. D.

- Godley), V. II, Cambridge-Massachusetts-London, Loeb Classical Library, 1957, էջ 116-127:
- ³ J. Junge, *Saka-Studien, Der ferne Nordosten im Weltbild der Antike*, Leipzig, 1939, էջ 44, 90:
- ⁴ B. A. Turayev, *Istoriya Drevnego Vostoka* (Հին Արևելքի պատմություն), T. II, Լենինկրատ, 1935, էջ 138. նաև՝ V. V. Masson, *Drevnezemledevcheskaya Kultura Margyani, Materyali I Isledovaniya Po Arkheologii SSSR* (Մարերի հնադարեայ աշխարհագրագիտական մշակոյթը, հնագիտութեան նիւթեր եւ ուսումնասիրութիւններ), Vip. 73, Մոսկուա-Լենինկրատ, 1959, էջ 148. նաև՝ I. M. Diakonov, *Ocherki Istorii Drevnego Irana* (Ակնարկներ հնադարեայ Իրանի պատմութեան), Մոսկուա, 1961, էջ 92:
- ⁵ A. T. Olmstead, *History of the Persian Empire*, Chicago, 1948, էջ 291. նաև՝ Masson, էջ 149. նաև՝ *Istoriya Tadjikskogo Naroda* (Տաճիկական ժողովրդի պատմություն), T. I, Մոսկուա, 1963, էջ 206:
- ⁶ I. M. Diakonov, *Istoriya Midii* (Մարաստանի պատմություն), Մոսկուա-Լենինկրատ, 1956, էջ 340 եւ յետ. նաև՝ *Istoriya Tadjikskogo*, էջ 158:
- ⁷ F. Altheim, *Weltgeschichte Asiens Im Griechischen Zeitalter, T. I*, Հալլէ, 1947, էջ 142:
- ⁸ Diakonov, *Istoriya Midii*, էջ 342 եւ.:
- ⁹ E. Herzfeld, *The Persian Empire. Studies in Geography and Ethnography of the Ancient Near East*, Վիսպաստէն, 1968, էջ 288, 292, 296:
- ¹⁰ Մեդիմնու-տարողութեան չափ սորուն մարմինների համար, որն օգտագործում էին հին Յունաստանում: Ատտիկեան մեդիմնուը հաւասար էր մօտաւորապէս 52,5 լիտրի:
- ¹¹ Հերոդոտոս, III, 89-97:
- ¹² «Դարեհ Վշտասայի Բիւթթունեան Արձանագրութիւնը» (թրգմ. քնագրից, առաջարան եւ ծխթ. Գ. Նալբանդեանի), Երեւան, 1964, էջ 8. նաև՝ R. Kent, *Old Persian. Grammar. Texts. Lexicon*, 2nd ed., New Haven, 1953, էջ 119. նաև՝ *Les Inscriptions de la Perse Achéménide, Traduit du Vieux Perse, de l'Élamite, du Babylonien et de l'Araméen*, présenté et annoté par Pierre Lecoq, Paris, Gallimard, 1997, էջ 188:
- ¹³ Հերոդոտոս, III, 97:
- ¹⁴ Բարկէն Յարութիւնեան, «Աքեմէնեան Պարսկաստանի XVIII Սատրապութեան Տեղադրութեան Շուրջ», *Հանդէս Ամսօրեայ*, Վիեննա, 1999, թիւ 1-12, էջ 96-97. նաև՝ Յովհաննէս Խորիկեան, «Աքեմէնեան Պարսկաստանի XI Եւ XV Սատրապութիւնների Տեղադրութեան Շուրջ», *Լրաբեր Հասարակական Գիտութիւնների*, 2006, թիւ 1, էջ 147-157:
- ¹⁵ Kent, էջ 127:
- ¹⁶ Նոյն, էջ 123:
- ¹⁷ Նոյն, էջ 127:
- ¹⁸ Նոյն, էջ 123, 127:
- ¹⁹ Հերոդոտոս, III, 96:
- ²⁰ M. A. Dandamayev, *Politicheskaya Istoriya Akhemenidiskoy Derjavii* (Աքեմէնեան Պետութեան քաղաքական պատմություն), Մոսկուա, 1985, էջ 108-109. նաև՝ Հերցֆելդը Հնդկաստանի նուաճումը թուագրում է Ք. ա. 519-518ին (E. Herzfeld, "A New Inscription of Darius from Hamadan", *Archaeological Survey of India*.

- Memoires*, N 34, Calcutta, 1928, էջ 2), իսկ Օլմսթեդը՝ Ք ա. 513ին (Olmstead, էջ 145): Ստրուվեն՝ Ք.ա. 514ին, 516-515ին արշաւանքի նախապատրաստութիւնն էր (V. V. Struve, *Etjudi Po Istorii Severnogo Prichernomoriya, Kavkaza I Sredney Azii* (Ուսումնասիրութիւններ Հիւսիսային Մերձսեւծովեան, Կովկասի եւ Միջին Ասիայի պատմութեան), Լենինկրատ, 1968, էջ 102):
- ²¹ Dandamayev, էջ 282:
- ²² Dandamayev, *Iran Pri Pervikh Akhemenidakh (VI v. do. N. E.)* (Իրանը Աքեմենեան վաղ շրջանին, Ք.ա. Զ. դար), Մոսկուա, 1963, էջ 80:
- ²³ Kent, էջ 136:
- ²⁴ Նոյն, էջ 137:
- ²⁵ Kent, էջ 136:
- ²⁶ Այս արշաւանքը դնում են Ք.ա. 516ի եւ 512ի միջեւ (Dandamayev, *Politicheskaya*, էջ 109, 111):
- ²⁷ Dandamayev, *Politicheskaya*, էջ 111 (Շեմերէնիին ենթադրում է, որ *Skudra* նշանակում է այն սկիւթական ցեղերը, որոնք ապրում էին Մակեդոնիայում կամ Թրակիայում (O. Szemerényi, *Four Iranian Ethnic Names: Scythian-Skudra-Sogdian-Saka*, Wien, 1980):
- ²⁸ M. A. Dandamayev, V. G. Lukonin, *Kultura I Ekonomika Drevnego Irana* (Հին Իրանի մշակոյթը եւ տնտեսութիւնը), Մոսկուա, 1980, էջ 111:
- ²⁹ Հերոդոտոս, VII, 100:
- ³⁰ Նոյն, VII, 61-96. նաեւ՝ *Herodotus*, V. III, Cambridge-Massachusetts-London, Loeb Classical Library, 1957, էջ 374-399:
- ³¹ Herzfeld, *The Persian Empire*, էջ 310:
- ³² Հերոդոտոս, VII, 73:
- ³³ Բարկէն Յարութիւնեան, *Հայաստանի, Հայ-Իրանական Յարաբերութիւնների Եւ Առաջաւոր Ասիայի Հնագոյն Պատմութեան Մի Քանի Խնդիրների Շուրջ (մ. թ. ա. VII-VI դ.դ.)*, Երեւան, 1998: Հմմտ.՝ Յ. Խորիկեան, «Սատրապական Հայաստանի Արեւմտեան Եւ Հարաւային Սահմանները մ.թ.ա. VI-IV Դարերում», *Պատմաբանասիրական Հանդէս*, 2005, թիւ 3, էջ 181:
- ³⁴ Kent, էջ 151:
- ³⁵ Նոյն, էջ 165, 178:
- ³⁶ Lecoq, էջ 138: Հերցֆելդը գրում է. “*the Akōfaçiya lived in southern Lāristān and Kirmān on the Indian Ocean*”, իսկ մէկ այլ տեղում էլ գրել էր, որ “*the Qufs, Kōç, inhabitants of the Bashākird mountains between Hormuz and the Kōh i Bāriç, appear in Xerx.Pers. daiv. as OP. akōfaçiya > kōfiç (qufs) > kōhiç > kōç, from OP. kōfa «mountain», *kōfaka «mountaineer*” (Herzfeld, էջ 300-301, 365): Օլմսթեդը Akaufakaն (the Mountain Land) տեղադրում է ներկայիս Աֆղանստանում՝ Քարուլից հիւսիս (Olmstead, էջ 231):
- ³⁷ Յարութիւնեան, «Աքեմենեան Պարսկաստանի», էջ 45-114:
- ³⁸ Հերոդոտոս, III, 97:
- ³⁹ *Pauly's Real-Encyclopädie der Classischen Altertumswissenschaft*, Stuttgart, 1958, s. v. Daai, S. 1945-1946:
- ⁴⁰ Հերոդոտոս, I, 125:

- ⁴¹ Kent, էջ 155-156: 5-7րդ տեղերում պետք է յիշատակունեն արեյը, բակտրիացին, սոգդիացին (նոյն, էջ 156). նաև՝ Lecoq, էջ 271:
- ⁴² Տե՛ս, օրինակ, Վ. Բայրուրդեան, *Իրանի Պատմություն (Հնագոյն ժամանակներից Մինչև Մեր Օրերը)*, Երևան, 2005, էջ 57-58:
- ⁴³ Հերոդոտոս, III, 97:
- ⁴⁴ Քսենոփոն, *Անաբասիս* (թրգմ. Ս. Կրկեաշարեան), Երևան, ՀՄՄՀ ԳԱ Հրատ., 1970, էջ 20:
- ⁴⁵ Նոյն, էջ 197:
- ⁴⁶ Dandamayev, V. G. Lukonin, էջ 111-112:
- ⁴⁷ Herzfeld, էջ 306:
- ⁴⁸ Arrian, *Anabasis Alexandri* (With an English translation by E. Iliff Robson), V. I-II, Cambridge-Massachusetts-London, Loeb Classical Library, 1958-1961, III, 8; 11, էջ 246, 257. նաև՝ Arrian, *Pokhod Aleksandra* (Perevod S Drevnegrecheskogo M. E. Sergeyenko) (Աղեքսանդրի արշաանքը, թարգ. Մ.Ե. Մերգելենկո, հին լուսարկից), Մոսկուա-Լենինկրատ, 1962, III, 8; 11. նաև՝ Արիանոս, «Աղեքսանդրի Արշաանքը», *Աղեքսանդր Մակեդոնացի*, Երևան, 1987, էջ 97, 101:
- ⁴⁹ Ըստ Ստրաբոնի՝ Կելեսիբիան լայն առումով տարածում էր մինչև Եգիպտոս եւ Արաբիա, իսկ նեղ առումով՝ Լիբանանեան եւ Անտիլիբանանեան լեռների միջև (Strabon, *Geografiya V 17 Knigakh* (Աշխարհագրություն 17 գրքով), Perevod, Statya I Komentari G. A. Stratanovskogo, 1964, էջ 699-700):
- ⁵⁰ Հերոդոտոս, II, 30:
- ⁵¹ Նոյն, II, 141:
- ⁵² Նոյն, III, 5. նաև՝ Herodotus, III, 5, էջ 8-9: Հերոդոտոսի երկի ռուսերեն հրատարակության մեջ թարգմանուած է «արաբների թագաւորութեանը», ինչը խօսում է արաբների ոչ թէ էթնիկական ներթափանցման, այլ ինչ-որ ցեղային իշխանութեան քաղաքական սահմանների մասին (Gerodot, *Istoriya V Devyati Knigakh* (Պատմություն 9 գրքով), Perevod I primechaniya G. Stratanovskogo, Լենինկրատ, 1972, էջ 139):
- ⁵³ Հերոդոտոս, III, 5:
- ⁵⁴ Նոյն, II, 6; III, 5:
- ⁵⁵ Նոյն:
- ⁵⁶ Տրաբոն, էջ 58, 65, 702: Առանձին դեպքերում Ստրաբոնը Սերբոնիս Լիճը շփոթում է Մեռեալ Ծովի հետ (նոյն, էջ 703-704, 707):
- ⁵⁷ Նոյն, էջ 65, 703:
- ⁵⁸ Հերոդոտոս, II, 12:
- ⁵⁹ Արիանոս, էջ 86-87:
- ⁶⁰ Ռուփոս, «Աղեքսանդր Մակեդոնացու Պատմությունը», *Աղեքսանդր Մակեդոնացի*, Երևան, 1987, էջ 333: Տե՛ս նաև՝ Kvint Kurtsii Ruf, *Istoriya Aleksandra Makedonskogo* (Աղեքսանդր Մակեդոնացու պատմությունը), Մոսկուա, 1963, էջ 93. նաև՝ Rufus Curtius Quintius, *History of Alexander* (With an English transl. by John C. Rolfe), V. I-II, Loeb Classical Library, Cambridge-Massachusetts-London, 1956, էջ IV, VI, 21:
- ⁶¹ Ռուփոս, էջ 319-320. նաև՝ Արիանոս, էջ 79:

⁶² Strabon, էջ 699.

⁶³ Ռուփոս, էջ 319: Այս հատուածում խօսքը գնում է թափառական արարների մի խմբի մասին, որը հասել էր մինչև Լիբանանեան լեռների շրջանը, չնայած համաձայն Պլուտարքոսի՝ արարները բնակւում էին Անտիլիբանանեան լեռներում, ինչն աւելի ճիշտ է (Plutarkh, *Aleksandr, XXIV.-Izbranniye Jizneopisaniya* (Աղեքսանդր ԲՂ.-ընտիր կենսագրութիւն), *T. II*, Մոսկուա, 1987):

⁶⁴ Տե՛ս օրինակ՝ Արիանոս, էջ 68, 73:

⁶⁵ Ռուփոս, էջ 295, 310:

⁶⁶ Քսենոփոն, էջ 20:

⁶⁷ Strabon, էջ 686, 693-694, 708:

⁶⁸ Քսենոփոն, էջ 17:

⁶⁹ Նոյն, էջ 18-20:

⁷⁰ Հերոդոտոս, III, 5-9:

⁷¹ Նաբաթէացիների մասին մանրամասն տե՛ս՝ Strabon, էջ 703, 718, 720, 740:

⁷² Հերոդոտոս, III, 88, 91:

HERODOTUS' LIST OF THE SATRAPIES (A HISTORICO-GEOGRAPHIC STUDY)
(SUMMARY)

HOVHANNES KHORIKIAN
hovhkor78@mail.ru

The author highlights the importance of Herodotus' list of the Satrapies for the study of the administrative divisions of the Achaemenian state. The author notes that there are diverse, controversial claims about the sources of this list.

The comparison of Herodotus' list with information of antique and ancient Persian cuneiform inscriptions discloses historico-geographical facts, which have significant importance for the study of the history of the Achaemenian state and of those people who were incorporated into it.

The multifaceted examination of the sources shows that during the two centuries of the Achaemenide state the Satrapies underwent administrative re-formations, which aimed at consolidating the power of the Persian administration and securing the regular payment of taxes.

